

م.ع. صابری

اوشاقلار ایچون شعرلر

۱۹۰۶ - ۱۹۱۰

جامشچی و سیل

بیر کیشی ساخالایوردی بیر جاموش،
سو قاتیردی سوده، ایدیردی فروش.

یاغدی شدتله بیر یاغیش ناگاه،
کیشینگ وضع حالی اولدی تباہ.

دوتدی دنیانی سیلرک جوشی،
در زمان آلدی، گیتدی جاموشی.

کیشی آغلار گوزله قیلدی فغان،
سویلدی اوغلی: آغلاما، باباجان!

چونکه سو سودلره طفیل اولدی،
قاتدیغک سو بیغیلدی سیل اولدی.

ایندی جاموشگی آپاردی ایسه،
باشکه وحشری قویاردی ایسه،

سویامه کیم، فلک قضاسی در اول
دوتدیغک ایشلرک جزاسی در اول.